

Xa
2881

10. Deutsche Oration 10.

Von denen loblichen

Thatten / vnd Heroischen Tugenden /

auch von dem Christlichen vnd seligen Ende des Hochgebornen Fürsten vnd Herrn / Herrn Carls Fürsten vnd Grafen zu Mansfeld / Edlen Herrn zu Horderingen / der Röm: Kay: Mtt:rc. Rath vnt d Obristen General Leuten Amt des Christlichen Heers im Königreich Hungern / vnd der Röm: Mtt:rc. zu Hispanien Rath vnd Admiral des Inders ländischen Meers / rc. hochseliger gedechtnuß.

Gehalten durch

Georgium Scherer Societatis Iesu Theolo-

gum / zu Wienn den 7. Septemb: Anno 1595. in

derselben Societet Kirchen / bey der Catholischen Be-

geng: vnd Besingnussen deren daselbsten depositierten

fürstlichen Leich / in gegenwert fürst: Durch:

Vincentij / Herzogen zu Mantua

vnd Montforat / rc.

Hebr: x i.

Fortes facti sunt in bello, castra verterunt exterorum.

Sie sein starck worden im Streit / haben der frembden HeerLäger in die flucht geschlagen.

Gedruckt zu Wienn in Osterreich bey Leonhard

Formica, in der Lämbel Burschen.

BIBLIOTHECA
MUNICIPALIANA





IN MORTEM.



*Regone succubuit morti Mansfeldius Heros?
O nimium eximijs mors inimica viris.
Siccine quem belli vexit super æthera virtus,
Sublimemq; tulit gloria morte iacet?
Siccine quem Geticus nequijt Mars perdere ferro,
Lethifera fixus cuspide mortis obit?
Siccine quem toto celebrant tot in orbe triumpho,
Iam victus morti parta trophæa dedit?
O mors, ô nimium felicibus inuida cœptis;
O nimium telis perfidiosa tuis.
Iam vir hic oppresso tot iam labentibus annis
Cœperat Hungarico reddere sceptrâ solo:
Et tunc miseris redeat felicior ætas,
Inuidiæ stimulis exagitata furis?
Quid iuuat insano tantum indulgisse dolori?
Nil tua, nil damni, tela tulere viro.
Viuit is, & vita meliori degit Olympo,
Nec velit hanc vitam posse redire sibi.
Sic vbi victricem fore te scelerata putasti
Ipsa pij herois funere victa iaces.*



Sie geliebten vnd Andechti-
gen in Christo Jesu vnserm Herrn
vnd Heylandt / Es haben die vn-
glaubigen Heyden vber der Men-
schen Leben vnd Todt drey Göttin
gesetzt vnd auffgeworffen / eine heisset Clotho / die
ander Lachesis / die dritte Atropos / Davon diser
Vers:

Clotho colum gestat, Lachesis net, & Atropos occat.

Das ist:

Clotho traget vnd haltet in der Handt den
Rocken oder Kuncel / daran das Werch / Flachs
oder Haar des bestimbten Menschlichen lebens an-
gebunden vnd umbwunden. Bil Werch bedeutet
langes leben / wenig Woll oder Werch bedeutet kur-
zes lebens.

Lachesis spinnet den Faden des Lebens / einem
lenger / dem andern kürzer / nachdem ein jeder Flachs
oder Haar an der Kuncel hat.

Atropos zubricht vnd zerreisset den gespunnen
Faden / vnd endet also das leben des Menschen auff
diser vergencklichen Welt.

Dise drey Schwester vnd Göttin werden mit
A ij einem

einem gemainen Namen Parca genendt / widersin-
nisch zuuerstehen / daß sie nemlich keinem Menschen
vnter der Sonnen / er sey Reich oder Arm / Edl oder
Bnedl / jung oder alt / hoehes oder nidern Standts /
zuuerschonen pflegen / sondern jederman ohne alle
exception vnd vnterschied / wann die zeit verhanden /
auffarbeiten vnd tödten.

Dises war der blinden Heyden gespunst vnd
Gedicht von disen dreyn Göttin.

Wir Christglaubigen aber wissen weder von
Göttern noch von Göttin / sondern nur von einem
einigen / waren / lebendigen vnd Allmächtigen Gott /
der Himmel vnd Erden auß nichts erschaffen.

Diser allein hat vber vnser leben zu gebietten /
in dessen Handt allein stehet vnser Leben vnd Ster-
ben / wir athmen vnd leben so lang er wil / vnd ster-
ben wann er wil / Er hat einem jeden ein Ziel gesteckt /
daß nicht kan vberschritten werden / der Faden vn-
sers Lebens spinnet sich nach seinem gnedigen wil-
len / vnd reisset ab oder bricht nach seinem Göttli-
chen wolgefallen.

Job 14.

Breues dies hominis sunt, numerus mensium eius
apud te est. Constituisti terminos eius, qui præteriri
non poterunt. Des Menschen tåg / sagt Job / seindt
kurz / Die zahl seiner Monaten stehet bey dir / du
hast im sein Ziel gesetzt / welches nit kan vberschrit-
ten werden. König Ezechias gedachte vnd sprach in
seiner

seiner tödtlichen Kranckheit: Dum adhuc ordire,
succidit me, Da ich gleich auffschosse/ vnd in der be- Esa. 38.
sten Blüe vnd auffnemen war/ da risse der Faden/
vnd Er schnidte mich hinweg von dem Erdboden
der lebendigen. Solchen seinen Gewalt übet vnd
practiciret Gott täglich/ ja stündlich/ mit vns Men-
schen kindern.

Solche seine Macht vnd Gewalt hat Er new-
lich den 14. Augusti dises lauffenden 1595. Jars er-
zeigt vnd bewisen an dem Hochgebomen Fürsten
vnd Herrn/ Herrn Carl/ Fürsten vnd Grafen zu
Mansfeld / Edlen Herrn zu Holderingen / Röm:
Kay: Mitt: Rath vnd Obristen General Leuten-
Antzt vber das Christlich Heer in dem Königreich
Burgern/ auch Röm: Mitt: Rath vnd
Admiral des Niderlendischen Meers/ etc. hochseliger
gedächtnuß / wie dann sein trawrige vnd hochbe-
weinliche Leich vnd Sarcck allda vor Augen stehet.

Von dises in Gott rhuenden Fürsten lobwirdi-
gen Thatten vnd Tugenden sekunder vor diser anse-
henlichen Versammlung zu reden mir gar schwer fal-
len wil/ theils wegen der menig/ vile vnd grösse der-
selben dapffern Thatten vnd Heroischen Tugent-
den/ theils wegen der enge vnd fürze der zeit.

Damit ich aber nicht gar stillschweige / wil ich
aus vilen nur Fünff Tugendten erwölen vnd für-
halten. Erstlich des Mansfeldischen Fürsten starck

A iij vnd

vnd großmüetigkeit. Fürs ander/ sein prudentiam;
fürsichtigkeit/ hohen Fürstlichen verstand vnd weis-
heit. Fürs dritdt / sein Iusticiam oder Gerechtigkeit.
Fürs vierdt/ sein Liberalitet/ mild vnd freygebigkeit.
Letzlich vnd fürnemblich sein Pietet/ Gottseligkeit/
Andacht/ Christlichen Eysen/ waren Glauben vnd
Bekandtnuß.

Ewr Lieb vnd Andacht wöllen mich günstiglich
anhören / vnd keinen verdruß haben vber der un-
zierligkeit vnd vngeschaffenheit meiner wort/ sondern
auff die Sachen selber fleissig mercken vnd achtung
geben.

Betreffend dises in Christo entschlaffenen Für-
sten Fortitudinem, Großmütigkeit/ Stercke/ vnd
Kitterliche dapfferkeit / haben ihr Fürst: G. manche
prob dauon sehen lassen / nicht allein in Niderlän-
dischen vnd Franckosischen Kriegen vñ Schlachten/
in eynnemung Landt vnd Leüt / vnd eroberung
vester Heüser/ Schlöffer vnd Stätt derselben orten/
sondern auch im heurigen Hungarischen Anzug
wider den Erbfeind des Christlichen Glaubens vnd
Namens wider den Türcken.

War ist es/ daß diser Herz von Mansfeld sein
lehtag niemals mit dem Türcken gekrieget / sondern
mit andern feinden Gottes/ der Kirchen vnd seines
Königs/ zuthun gehabt / jedoch hat er sich für dem
Türcken gar nicht gefürchtet/ sondern je mehr er ge-
höret

höret von seiner Macht vnd Stärke / auch von seiner
Kriegs geschwindigkeit vnd erfahrung / je mehr ist
ihm das Hertz gegen ihm gewachsen / vnd je grösser
ihm sein muet worden. Virtus enim circa difficilia &
ardua versatur: Die Tugend ringet nach grossen/
hohen vnd schwären sachen / die vil schnauffens be-
dürffen vnd ein gefahr auff sich haben / Was darffs
vil wort? Er schlegt den Türcken vor Gran den 4.
Augusti bisz auff's Haupt / vnd vertreibet ihn auß
seinem Leger / bekompt seine Zält / Ross / Camel/
Geschütz / Munition / ꝛc. Dasz auff disen Kriegsherrn
etlicher massen kan verstanden werden auch was
S. Paulus meldet von Gedeon / Barac / Samson / Zeb: 17.
Zephte / David / ꝛc. Fortes facti sunt in bello, castra
verterunt exterorum. Sie seind starck im streit wor-
den / vnd haben der frembden Heerlager erlegt vnd
in die flucht geschlagen. Za in disem treffen ist er
für sein Person auff's dritze Ross kommen / vnd
man hat ihn allenthalben zu vorderist an der spizen
gesehen / vnd gehöret / wie er dem Kriegsvolck ernst-
haft vnd tröstlich / mit vnterschiedlichen Sprachen /
deren er siben zierlich reden vñ schreiben können / zu-
gesprachen / Dese vermahnet / jene gelobt / andere ge-
scholten vñ angetriben / so lang vñ bisz der bewuste
glücklich Sig erfolget ist. Vor diser Schlacht vñ
terstunden sich etliche auß den vnsern / den Grafen
von Mansfeld kleinnüetig vnd verzagt zumachen /
u u u u
schriben

schriben ihm feige vnd forchtsame Zettel zu / er soll
dennoch sehen was er thue / damit er weder sich noch
andere in gefahr gebe / der Türck köme starck daher /
vnd habe bey sich 30. Tausent (welches doch falsch
war) lauter Janitschären / vñ 12. Tausent Tattern /
außer des andern Volcks. Nachdem er solcher ver-
zagten Briefflein bey fünff nach einander empfienge
vñ las / ergrimmet er in im selber vñ sprach: Was ist
das? Wil man mir das Hertz nemen vnd rathen zur
flucht? Bin ich darumb ein so weiten weg her
men / daß ich dem Türcken soll den Rücken wen-
den vnd fliehen? Soll ich der Kaiserlichen Mt: R.
mir vnd meinem Geschlecht / disen vnablöschlichen
schandfleck anhencken? Das verhüet mein Gott /
in den ich hoffe / Ich wil hinan vnd mein Heyl ver-
suchen / da gleich Dreissig Tausent lebendiger Teu-
fel im Feld wären / Komme mir nur kein Bott mehr
vnter die Augen / mit solchem kleinmüetigem Schrei-
ben / ich spalte im sonst den Kopff von einander / Es
muß mit Gottes hilff hewer anders sein als ferden.

Mit solchem Heldenmuet vnd Lewen hertzen
setzet er in den Feind vnd sieget mit grosser eh: vnd
frewd der gantzen Christenheit / wider Fünffzehen
Tausent außklaubter wolversuchter Türcken / dar-
vnder etliche Bascha vnd vil Beggen gewesen / vnd
zum warzeichen dises ansehnlichen Sigs / schieft er
alsbald auff Prag 18. Türkische Fahnen / welche
der

der Röm: Kay: Mt: ic: den 14. Augusti neben zweien
gefangnen Türcken præsentiert worden.

Dieses Mansfeldischen Fürsten Kühheit vnd
großmüetigkeit gemahnet mich vil an den Kriegß=
fürsten Leonides genandt/ denn da er allein mit 300. *Plutarch. in*
Mann/ dem vnzehlichen KriegßHeer Xerxis die *Parall. &*
Thermopolische Clausen/ als den Schlüssel vnd *Apoph.*
Eyn gang des Griechenlands zu bewahren/ entge=
gen zoge/ vnd Xerxes von ihm begeret / daß er in
ansehung der vbergrossen Macht des Feindts sich
guetwillig ergeben/ vnd die Kriegßwaffen vñ Clau=
sen im oberliffern solte / gab er im kühlich dise ant=
wort: Veni & cape/ Komme vnd hole sie/ Da aber
einer zu großem schrecken hinzu setzet / Es were ein
solche vnglaubliche menig der Feindt/ daß auch die
Sonn am Himmel von geschossenen Pfeilen müste
verfinstert werden/ Antwortet Leonides scherzwaß:
Wollan/ so wirdt vns die Sonn desto weniger ste=
chen/ vnd wir werden desto besser in der küle vnd
schatten mit einander zu streitten haben.

Es pfleget der Atheniensisch Philosophus vnd
KriegßHerz Chabrias zusagen: Ein Heer von lau=
ter Hirschen oder Hasen/ darüber ein Lew Obrister
ist / sey erschrocklicher weder ein Heer von lauter
Lewen / da der Obrist ein Hirsch oder Hase ist/ So
gar ligt vil an der großmüetigkeit eines Obristen/
welche an unserm Mansfeldischen Herrn zu finden
gewesen/

B

gewesen / dermassen / daß er auch nichts hören mögen / was etwa nach der zaghaftigkeit oder Kleinmütigkeit gelautet.

Da bald im anfang der bemelten Schlacht ein Bott kame / der ihme anzeiget / was massen seine Wallonen dem Türcken zu schwach / vnd von im geschlagen wären / stuzet er ein wenig vber diser zeitung / Aber bald erholet er sich widerumb / vnd sagt / Ich kan es nit glauben : Nur immer fort. Von stundt an darauff kompt ein ander Bott vnd bringet das widerspil / daß nemblich die Wallonen ehr eyngelegt / vnd sich Ritterlich verhalten.

Als ein Hunger mit blossen Säbel durch das Christlich Leger rennet vnd allenthalben schrie: Es ist mit vos verlorn / es ist mit vns verloren / vñ wolte mit solchem Zettergeschrey forcht vnd schrecken im Leger anrichten / gebotte Fürst von Mansfeld als bald / daß man ihn flux vnd also warm vnd frisch / mit Sporn vnd Stiffeln / anknüpfen vnd auffhengen soll / welches den beschehen / vnd des Hungern gebürlicher lohn gewesen. Unser Mansfeld ist kein Weib / sondern ein Mann zu Feld / lasset sich nicht liederlich schrecken.

Was hat vns Teutschen bissher mehr gemanglet / als am freudigen muet vnd vnerschrocknem herzen / an grossen Federbuschen hat es nicht gemangelt / auch nicht an vil scheeckigen Kleidern / noch an Helm
vnd

vnd Sturmhauben/ an Panzern vnd Harnisch/ an
Behren vnd Wassen/ an wolgebuckten Pferden/ an
prächtigen rhumsüchtigen Worten/ an Polzmartern
vnd schnarchen/ vnd was des dings mehr ist/ Das
Hertz das Hertz/ sage ich/ des man pflegt wider die
armen Leüt vnd Vnderthanen zubrauchen/ das ist
vns gegen dem Feind abgangen / Denn so bald es
zum ernst kommen/ hat sich der Hase im Buesen
gerüret / vnd das Hertz ist in die Schuch hinunder
gefallen. Wie dann noch in disem Leger auff ein ver-
zagtes geschrey/ daß saget/ Der Türck komme vnd
nahe sich/ ein schändliche flucht sich erhebe. Wo
war da das Hertz Leonidæ des Königs der Spar-
taner/ welcher dem / der im saget : Der Feind nahe
sich herzue/ dise küne antwort gab: Nahet der Feind
zu vns/ so nahen wir zu im. Hette damals Graff
von Mansfeld nicht das beste gethan/ so weren wir
vmb Gran/ Läger/ vnd vmb alles kommen mit vn-
widerbringlichen Spot vnd schaden. Da stehet
aber hochgedachter Graff wie ein Lew mit blossem
Schwert vnd schreyet den flüchtigen Kriegsleuten
zue/ was sie sich zeihen/ wo sie doch hin gedencen/
was doch das für ein flucht vnd straff von Gott
vber sie sey/ ob sie sich nicht erinnern/ daß sie Chri-
sten seyen/ vnd daß ein Christen Mann so gut sey
als drey Türcken/ darzue die vnsern dem Türcken in
der zall vberlegen / vnd drey an einen Mann ha-
ben/ &c.

0000

ben/ &. Mit disen vnd dergleichen Worten hat er die flucht auffgehalten/ nit anders als wie jemand ein wildes lauffendes Ros im vollem lauff auffhelet vnd stillstehen macht/ er war wie Alexander der Buccephalum bändigen vnd reiten kondte. Aber genug von dem Ersten puncten/ ich komme auff den andern.

Prudentiam, Die Fürsichtigkeit vnd Weisheit haben ihr Fürst. G. hochlöblicher gedächtnuß/ in vil weg von sich leuchen vnd scheinen lassen/ beuorab in widerbringung/ an vnd auffrichtung der Mannszucht vnd Kriegs Disciplin/ die ein zeit gar erlegen. Denn ewr Lieb tragen guet wissen/ daß vnser Leger zuuor dermassen beschaffen gewesen/ daß meniglich ober der großmechtigen vnordnung sich verwundern müssen/ vnd in alle Welt außgeschrieben worden/ wie vnrichtig es darinnen zue gehe/ vngeacht viler Obristen die sich groß Französichen vnd Niderlendischen Kriegs berümbt. Dise vnordnung vnd vnrichtigkeit hat Graff von Mansfeld widerumb alsbald in ein solche ordnung vnd richtigkeit gebracht/ daß sein hocher verstand dardurch gnugsam an tag kommen/ vnd Gott im Himmel darüber von meniglich gelobt vnd gedanckt worden.

Prophet Balaam sahe von fern das Heerlager der Kinder von Israel/ vnd kondte sich nicht enthalten/

ten / sondern schrie mit verwunderung auff vnd sprach: Quam pulchra tabernacula tua Iacob, & tentoria tua Israel, Wie schön seindt deine Hütten o Jacob vnd deine Zelt o Israel. Num: 24

In dergleichen wort hat herausz brechen müssen / wer das Manßfeldisch wolgeordnete Christlich Heerleger gesehen.

Insonderheit aber hat sich diser Fürst in pflanzung vnd erhebung der Kriegs Disciplin nachfolgender Stuck beflissen.

Erslich / auff das er ein grossen gehorsam habe bey dem ganzen Heer / wie jener großglaubiger Obrister / der da zu Christo sprach: Ich bin ein Mensch der Obigkeit unterthan / vnd habe vnder mir Kriegßleut / wann ich zu einem sage / Gehe hin so gehet er / vnd zum andern / Komme her / so kompt er / vnd zu meinem Knecht: Thue das / so thuet ers. Wo kein gehorsam / da ist auch kein Kriegs zucht / sondern heisset: Vil Köpff / vil sinn. Matth. 23

Da König Saul gebotte seinem Kriegßvolck / nichts zu essen / bis er sich rechet an seinen Feinden / hatte er ein solchen gehorsam / das keiner auß allen gefunden war / der sein verbot überschritte / außser seines Sohns Jonathæ / der auß vnwissenheit nur ein wenig Hönig kostet / vmb welches Hönigs willen der Vatter in kurzumb wolte todt haben / vnd auch hinrichten hette lassen / wann nicht das Volck

B iij mic

mit gewalt abgewehret/ vnd den Sohn vom Todt erlöset vnd außgebetten.

Sext. Iul.
Front. lib. 3
Stratag.
Valer. max.
lib. 2. de di-
sciplina mi-
litari.
Tit. Liuius
li. 8. Decad.

Manlius Torquatus liesse seinen Sohn für dem Heer mit Rueten streichen vnd endthaubten/ darumb daß er wider seines Vatters verbott mit dem Feind geschlagen/ vnangesehen daß er obsigt / Vnd als das ganze Heer sich des Sohns annemen wolt/ batte er dafür vnd saget/ es sey mehr an der Kriegß Disciplin/ denn an seiner Person/ gelegen.

Plutarch.
in Apophtheg.

Plutarchus meldet vom Scipione Maiore: Er habe sich im Krieg auff den gehorsamb seiner Kriegßleuth verlassen/ vnd gerümbt/ Er wisse bey ihnen allen ein solchen gehorsamb vnd willfährigkeit / welchem er schiesset/ sich von jenem Thurn (darauff Scipio mit fingern weist) in das Meer herunder zu stürzen/ daß er es vnuerzogenlich thun wurde.

Dergleichen gehorsamb findet man vnder den Türcken/ denn es schreibt ein Teutscher Haußgesessener zu Adrianopol Anno 1526. den 1. Martij hievon also: Hie ist/ sagt er/ ein grosser gehorsam/ wann der Türckisch Kayser sagt: Gehe von Weib vnd Kindern. Zeuche in dise oder jene Insel. Wirff dich ins Meer / so geschichts. Der Türckisch Kayser hat vor einer Christlichen Botschafft Sechs betagte graue Menner für sich erfordern lassen/ welche nackt erschienen / ein jeder mit einem Sebel am arm/ vnd als sie dem Kayser die gebürliche vnderthänigkeit

Zeit mit niederfallen erzeiget / wolten sie wissen / was
der Kayser von ihnen begeret / da gebotte der Kayser /
daß ein jeder mit seinem Schwert sich soll durchste-
chen / das ist nu alsbald geschehen / vnd man hat sie
todt weg getragen / Hæc illæ.

Unser Fürst von Mansfeld suchte wol kein sol-
chen Heydnischen / Türckischen vnd Tyrannischen
gehorsam. Aber ein gebürlichen notwendigen Christ-
lichen gehorsam suchte er mit allem fleiß vnd ernst /
vnd bracht die Sachen so weit / daß ihn nicht allein
der gemein Kriegzman / sondern auch ansehnliche
Herrn vnd Obristen treffenlich vnd gehorsamblich
respectierten.

Zum andern bemühet sich hochgedachter Fürst
von Mansfeld frid vnd einigkeit im Läger / so wol
vnder den Obristen als vnder den andern / die auß
so vilen vndterschidlichen Nationen waren / zu pflan-
zen vnd zu erhalten / Dagegen allen mißverstandt
auff zuheben / vnd alle Zänckhändel in der gütte zu
schlichten vnd hin zulegen / Inmassen dann alle Par-
theyen in fürfallenden Streitpuncten sich auff ihn /
als auff einen woluersuchten / gehezt vnd ge-
wehrt / durch alle Spieß gelauffnen vnd hoche-
fahnen Kriegsherrn / lendeten / Dessen vrtheil vnd
auspruch jederman erwarten vnd leyden mögen.

Es ist ein hochnotwendiges ding vmb die ei-
nigkeit bey einem Kriegsherr vnd Läger / wie auch
bey

August. de
ciuit. Dei
lib. 2. c. 21.

Psal. 132.

Sextus Iuli-
us Frōtinus
lib. 1. Stra-
tag. cap. 10.

bey einer jeden Statt/Land vñ Volck/das der streck-
bare Held Scipio Africanus nicht vergebens die ei-
nigkeit einem rechtgestimbten Seittenspiel/so ein lieb-
liche resonantz vnd Meloden gibt/verglichen/dage-
gen die vneinigkeit einem vbel gestimbten Seitten-
spiel/dar eine oder meh: Seitten abgelauffen/vnd
derwegen vnlieblich vnd vbel lauret: Ecce quam
bonum & quam iucundum/sagt der Psalmist/habi-
tare fratres in vnum: Sihe wie gut vnd wie lieblich
ists das Brüder eyntrechtig mit einander wohnen.

Wir lesen von Scorylone der Dacier Kriegsfür-
sten/das er zwen grosse Jaghund/die zuuor je vnd
allweg einander in haaren zu ligen pflegten/auff den
Platz vnder das Kriegsvolck geführet: vnd nach
dem die Hund irer vorigen gewonheit nach/als bald
zusammen gefallen/vnd sich nu zimlich lange zeit
vnter einander hefftig zerbissen hetten/zeiget er inen
ein Wolff/welchen er der vrsachen halben aufge-
lassen hette/Da beyde Hund disen ersahen/liessen
sie von ihrem zancck/vnd fiengen an eynmütigklich
mit einander demselbigen nach zu jagen.

Mit welchem Exempel diser weise KriegszObri-
ster seinen Kriegzleuthen zuuerstehen geben wol-
ten/man künde leichtlich alle priuat händel/eyn-
heimische Krieg vnd Bezancck auff die seiten legen/
vnd sich also mit einander vereinigem/das alle zu-
sammen setzen vnd für einen Mann wider den all-
gemeinen

gemeinen Feindt des Vatterlandts stehen vnd streitten.

Eben auff den Wolff/ das ist/ auff den Erb vñ Erbfeind des Christlichen Namens vnd Glaubens auff den Türcken/ haben ihr Fürstl: G. Herz Carl Fürst vnd Graff von Mansfeld seine Obristen vnd Soldaten gewisen/ welche etwa vntereinander spaltig sein wolten / mit dem lautern vermelden: Am Türcken sollen sie ihren Zorn außlassen / wider den Türcken sollen sie ire Messer wezen/ vnd ir Mannheit erzeigen / jetzt sey es nicht zeit den priuataffecten vnd Greinhändeln abzuwarten vnd statt zuthun / ein jeder soll sich beflissen an dem Türcken ein Ritter zu werden vnd ehr einzulegen.

Fürs Dridt/ ihr Fürst: G. Herz Carl Fürst vnd Graff zu Mansfeld haben fleiß angewendet/ damit das Christlich Leger nit ein ansehen hette/ als ob es ein Kretschm / ein Gartkuchen / ein Kirchtag / ein Bawern hochzeit / ein sicher Wolleben were / da man Tag vnd Nacht/ frü vnd spat schlemmen vnd temmen / raslen vnd prassen / singen vnd springen/ würfflen vnd karten/ pfeiffen vnd Trommetten/ jubilieren vnd kelberiern / Sondern das alles sein still/ züchtig vnd eyngezogen were/ fürnemblich bey der Nacht. Gegen dem Abendt vmb Acht Uhr hat man weder Wein noch Bier mehr verkauffet/ vnd gar selten ist ein trunckner Mensch im Leger gesehen

G

hen

hen worden / wie dann die Trunckenheit so wenig
zum Krieg tauget als die vnkeuschheit.

Vt Venus eneruat vires, sic copia Bacchi

Et gressus tentat, debilitatq; pedes.

Die Glider schwechet Venus süß /

Nacht stolpern Bacchus beide füß.

Es haben auch zum Vierdten jr Fürst: G. allzeit
ein guete Wacht / vnd streng darüber gehalten / seind
in der Nacht selber herum gezogen vnd zugesehen /
ob alles wol bestellt sey / was mangle oder mit man-
gle / vnd pflegten oft zusagen: Ein Kriegs Obrister
soll kein Nacht gar außschlafen / sondern ihm vom
Schlaff abbrechen / vnd immerzu in sorgen stehen.
Wie sie dann gemeiniglich zu Mitternacht vmb
Zwölff Uhr schlaffen giengen / vnd morgens frü vmb
Vier Uhr auffstunden / nach des Poeten Homeri
Carmen:

Uad. lib. 12.

*Non decet integram noctem dormire regentem
Imperio populos, & agentem pectore curas.*

Endtlich seind jr Fürst: G. mit allem ernst dar-
ob gewesen / damit dem armen Bawrsmann durch
streiffen vnd plündern der Landtsknecht / der we-
nigist schade nicht zugefügt wurde / wie dann die
Bawrn vnd arme Bndterthanen darumb daß ihr
Sächlein vnd Armuthen sicher vnd vnangestastet
verbliben / ihre Hände gen Himmel auffhebt vnd
Gott danck gesagt / daß einmal ein Obrister kōmen /
der

der sich irer vätterlich anneme / die Kriegfleut im
Zaumb halte / vnd das stehlen vnd rauben ab vnd
eynstelle.

Denn warumb soll der Christlich Fürst vom
Mansfeld disfalls die ordnung in sein Heer nicht
eynführen können / welche der Abgöttisch Heydnisch
Kenser Aurelianus eyngesüret / der zu seinem Kriegs-
Verwalter vnter andern also geschriben: Si vis Tri-
bunus esse, imo si vis viuere, manus militum contine.
Nemo pullum alienum rapiat: Quem nemo contin-
gat: vnam nullus auferat: segetem nemo deterat:
oleum, sal, lignum nemo exigat: annona sua quisq;
contentus sit: de præda hostis, non de lachrymis
prouincialium habeat, &c. Das ist: Wilt du mein
Kriegs Verwalter / Leuten Ambt oder Marschalch
sein / ja wiltu leben / so wehre den Kriegfleuten das
sie nicht zuegreiffen / keiner raube ein Hünlein / kei-
ner berüre ein Schaff / keiner breche ein Weintrau-
ben ab / keiner zertrette die Saat / keiner neme mit
gewalt es sey Del / Saltz oder Holtz / Ein jeder sey
zufriden mit seiner bestimbten vnd deputierten nah-
rung / vom Raub des Feindts vnd nicht von Zäh-
ren des Landvolcks hab er das seinig / &c.

In disen jetzt erzelten vnd vilen andern stucken
haben ir Fürst. G. der Kriegs Disciplin im Kenserli-
chen Leger / widerumb weißlich auff die füsse ge-
holffen.

G ii

Man

Flavius Vopiscus in vita Aureliani.

Man nimbt auch ihr Fürstl. G. Herrn Carls Fürsten vnd Graffen zu Mansfeld hohen verstand bey dem ab/ daß er seine Anschlag verschwigen vnd in geheim gehalten / vnd man nicht an allen orten vnd auff allen Plätzen wuste / was er thun oder fürnehmen wolte. Es ist ein hochschedlich ding / wann alle geheime Sachen im Krieg außgeschwäzert vnd außplodert werden.

*Sex. Iul.
Front. Stras
tag. lib. 1.
cap. 1.*

Da einest Metellus Pius gefraget war / was er des andern tags zuthun gesinnet wäre. Antwortet er: Wann mein Rock dises außschwätzen köndte wolte ich ihn verbrennen. Derwegen die Trunckenheit ein vnleichtlich Laster bey den Obristen vnd KriegsRäthen. *Prou. 31.* Nullum enim secretum vbi regnat ebrietas, Wo die Trunckenheit regiert / da bleibt nichts verschwigen. Die fürgenommene Belegerung der Hauptvestung Gran / hat vnser Fürst von Mansfeld so still gehalten / daß die Türcken eigentlich nicht wissen köndten / wo er mit seinem Heer hinaus wolte / Ja er stellet sich als ob er Dotis zu belegern bedacht wäre / vnd name den weg auff denselben orth zue / darnach vnuersehens schluge er sich auff Gran / vnd vberenlet die Türcken darinnen dermassen / daß menigklich in hoffnung gestanden / daß solche Bestung in kurzer zeit vnser sein werde / wegen der kleinen antzal der Türcken / die sich damalen darinnen funden / vnd es gewißlich geschehen wäre /

wäre / wann man nicht auß einem grossen vberse-
hen / wider des Graffen von Mansfeld beuelch vnd
anordnung / den Türcken gelegenheit geben hette /
sich mit gewalt durchzuschlagen / vñ in die Bestung
eynzukommen / Welche newe Türckische besatzung
vnd hülff vns hefftig zu ruck geschlagen / vñnd an
der schleinigen eroberung Gran mechtig vil verhin-
dert / gleichwol im dem Fürsten von Mansfeld die-
selbe Hauptvestung jederzeit dermassen angelegen
gewesen / daß er auch im Todtbett / kurz vor seinem
ende / mittel vnd weg / sie zubekommen / hochuersten-
dig fürgeschriben.

Damit wir vns aber nicht zu lang auffhalten
in des Fürsten von Mansfeld Prudentia oder Weiß-
heit / wollen wir schreiten zu seiner Iusticia vnd Ge-
rechtigkeit.

Die Gerechtigkeit ist ein hoch rümliche Tugend
an einem Kriegsfürsten / wie dann der Poet Virgi-
lius den streitbaren Helden Aeneam vñdter andern
auch von der Gerechtigkeit preiset :

Rex erat Aeneas nobis, quo iustior alter,

Nec pietate fuit, nec bello maior & armis.

*Verg. lib. 1.
Aeneid.*

Vñd bey dem Griechischem Poeten Homero li-
set man dises Carmen :

Iste bonus bellator erat, iustissimus idem.

Das ist : Diser war ein gueter Krieger / vñd zu-
gleich auch ein ganz gerechter Mann.

¶ iij

Solches

Solches Carmen lobet Alexander Macedo vber
andere Carmina Homeri/ so wol gefiel disem Kriegs
Fürsten / wann einer ein gueter Krieger vund dar
neben auch ein gerechter Mann war.

Mit diser Tugend ist Graff von Mansfeld au
genscheinlich gezieret gewesen/ Denn die frommen
hat er belohnet/ die bösen aber gestraffet / vnd dis
falls kein anseher der Person gewesen / hat oft für
nemen Hansen den Galgen gezeigt vnd gesagt: Mei
net ihr daß diser Galgen allein für den gemainen
Landtsknecht da stehe. Nein / er ist auch für euch
auffgericht vnd erbarret / so fern ihr euch nit hal
tet wie sichs gebüret. Wegen diser geraden vnd
scharpffen gerechtigkeit / fürchtet ihn meniglich / vnd
hüttet sich ein jeglicher / etwa / durch ein verbrechen
in sein Straff zu kommen / wie man liest / das Key
ser Aurelianus ein grosse forcht seinem Kriegsvelck
eingestossen mit disem einigen Exempel / welches er
statuirt vnd ergehen lassen wider einen Landts
knecht / der mit seines Wirts Weib den Ehebruch
begangen / Denn er liesse ihn bey den füßen an
zween hohe mit gewalt nidergebogene vnd niderge
zogene äst vnd Gipffel zweyer Baumb anbinden /
vnd darnach die äst vnuersehen auffschnellen / dar
durch der Kriegsmann von einander gerissen / mit
einem theil seines Leibs an einem / mit dem andern
an andern Baumb hangend blibe.

Vopis. in vi:
ta Aurel.

So

So wol dem armen als dem reichen hat er je-
derzeit willige audienz geben / jederman für sich ge-
lassen / kein vngelegenheit der zeit oder geschäften
jemals fürgewendet / auch guete außrichtung ge-
than allen denen / welche sich etwa von jemandt be-
schwert befunden. Bil particularia vñ Specialpuncten
von Mansfeldischer Gerechtigkeit / werden die zu-
erzehlen wissen / welche täglich vmb ihn gewesen /
vñ sein gerechtes gubernament mit augen angesehen
haben / Ich enle zu einer andern fürtrefflichen
Tugendt / nemblich zu des Herrn von Mansfeld Li-
beralitet, mild vnd freygebigkeit / welche man an im
auff vil weg gespüret vnd vermerckt.

Dem armen Kriegszman hat er seinen gebür-
lich vnd verdienten Lon trewlich nicht allein raichen
lassen / da anders Gelt verhanden gewesen / sondern
in auch extraordinarie begabet / Fürnemblich aber
hat er bedacht die verwundten vñ geschädigten
nothleidenden Kriegsknecht / deren ein jeder zwo
Kronen von ihm empfangen / Hundert verwundten
seindt zweyhundert Kronen / Zweyhundert ver-
wundten / vierhundert Kronen / vnd also fort / mil-
digklich dargeraicht worden.

Nach erobertem Sig vñ Victori wider die
Türcken / hat er jederman nach seinem Standt /
verdienen vnd wolverhalten reichlich remuneriert /
begabet vnd zu fridengestellet / Auch allzeit auff die
Zungen

Zungen vnd Kundtschaffter vil auffgehen lassen/
wol wissendt/ was daran gelegen / vnd das guete
exploratores vnd Kundtschaffter haben/ halber Krieg
sen/ Welches nicht bedencen jene Geizhals/ welche
das Gelt/ so sie auff die Zungen vnd Kundtschaff-
ter legen sollen/ ersparen wollen/ vnd darneben das
Kriegsvolck vnd die Festungen in eufferste gefahr
stecken.

So volgen auch die Obristen vnd Hauptleut
dem Herrn zu Mansfeld nicht nach/ welche nit al-
lein den armen Kriegzleuten nichts extraordinarie
schencken vnd zum besten geben/ sondern auch iren
Blutsawern/ vnd mit wagung Leibs vnd Lebens/
für Gott vnd für der Welt verdienten Lidlohn vnd
Sold eintweder abbrechen / oder gar ihnen halten
vnd zu ihrem eigen nutz verwenden / ja offtermals
schändlich verspilten/ verprassen/ verhuren vñ verbu-
ben/ Da entzzwischen mancher ehlicher Kriegzman
ausz mangel seiner besoldung erhungern/ oder in el-
lend vnd Kranckheit / trost/ hilff vnd labloser weiß/
erbärmlich sterben vnd verderben muß/ Warlich
das ist nicht ein kleine Sünd ettlicher Obristen vnd
Hauptleut/ sondern ein solche Sünde / die in Him-
mel hinauff ohn vnterlaß schreyet vmb Straff vnd
gebürliche eynsehung.

Unser auffrichtiger Fürst von Mansfeld ist nit
darumb so weitten weg zu vns herausz gezogen/ daß
er sich

er sich vil besäckeln vnd bereichen wolte / sondern
damit er nit allein dem hochlöblichen Haus Osterreich
vnd Kron Ungern / sondern der ganken Christenheit
dienen / vnd den grausamen Feind den Türcken
von vnsern Nacken vnd Halsen wegschlagen
vnd abtreiben möchte. Zu diesem Christlichen ende
vnd vorhaben haben ihr Fürst: G: guetwillig verlas-
sen iren / nunmehr höchstbetagten 92. jährigen Herrn
Vattern Peter Ernsten Grafen zu Mansfeld / ha-
ben verlassen ir hertz geliebte Frau Gemahel / haben
verlassen ansehnliche Beuelch vnd Empter / haben
verlassen ir eigen Vatterland / da sie als ein einiger
Sohn vil stattliche Güeter zu ererben gehabt / vnd
seind ober Zwenhundert Meil wegs / vngeacht vil-
fältiger zuegestandner vngelegenheiten / heraus zu
vns verreisset.

An welchem Exempel sich zu erspieglen haben /
etliche der Röm: Kay: Witt: ic. Vnderthanen / wel-
che ob sie wol dem Türcken nahet gefessen / vnd den
Feind gleichsam am Hoffzaun haben / dennoch nicht
auffzubringen noch zu erhandlen sein / man vber solde
vnd vberschütte sie dann mit Gelt / da muß man
mit ihnen lang marcken / Frätschlen vnd kauffen /
das sünd vnd schand ist / vnd wann es etwa an ei-
nem Pfennig oder kleinen vorthail mangelt / so
wollen sie kein zug thun / vnd soll gleich alles vber
vnd vber gehen. Hie sihet vnd greiffet man / daß
D solche

solche Vnterthanen nicht die ehr Gottes / nicht des
Vatterlandts wolffart vnd auffnehmen / nicht den
gemeinen nutz / sondern iren eigen gewinn vnd genieß
suchen / Es ist inen blößlich nur vmb das Gelt zu
thun / weiter gedencen sie gar nicht.

Solchen Mammonisten vnd Küssenpfemung
soll man auch gar kein Kriegsvolck vnd Ampt ver
trauen / denn weil der Mammon jr Gott / ist zu
besorgen / sie möchten vom Feindt Geschenck vnd
Gaben eynnehmen / vnd im Schloßer vnd Stätt /
Land vnd Leut vbergeben vnd verrathen.

Maro lib. 3.
Aeneid.

Quid non mortalia pectora cogis
Auri sacra fames?

Du verfluchter Gelthunger / was vbelß vñ jam
mers stiftest du nit durch die sterblichen Menschen?

Plutarch. in
vita P. Ae
mily.

Griechenlandt hatte vor zeitten auch solche ei
gennützigte guetgeittige Obristen vnd Hauptleut /
darumb es König Philippus leichtlich vnder sich
bracht / als er bemelte Obristen mit Gelt bestache
vnd corumpierte / wie dann die gemaine Sage
gieng: Non Philippum, sed Philippi aurum subegisse
Græciam, Nicht Philippus sondern Philippi Gelt
hab Griechenlandt im vnterwürffig gemacht.

Plutarch. in
Apoph. Re
gum & Im
perat.

Als eben deselbig König Philippus einest ein
Hauptvestung eynzunehmen fürhabens war / vnd
die Außspeher im relation thetten / Es sey nit allein
schwer sonder auch vnmöglich diser Vestung zue zu
kommen.

kommen. Fraget er sie/ Ob so vil raumb vnd ort
sey einen mit Goldt beladnen Esel hin zubringen.
Wolte hicmit andeuten/ es sey nichts so starck vnd
vest/ vnd nichts so wol verwahret/ das nit konde
durch Gelt erobert vnd vberwunden werden. So
dann dem also / Wer wolt den engemüßigen gelt-
gierigen Obristen vnd Hauptleuthen etwas zu
Kriegszeiten vertrauen?

Diesem hochschädlichen Laster des Geitzes war
vnsrer Fürst von Mansfeld von hertzen feind / Da-
gegen aber der löblichen Fürstlichen mildigkeit ganz
vnd gar ergeben biß an sein end/ wie er dann sechsß
stund vor seinem seligen ableiben dem/ der die frö-
liche Botschafft bracht/ das das Wasserstättlein zu
Gραν den 13. Augusti mit stürmender handt allbe-
reit enngenommen sey/ ein Ketten von 300. Gulden
verordnet/ vnd zuuor auch dem der die zeitung
von eroberung der Statt Gockern den 24. Julij/ ein
Ketten von anderthalb hundert Gulden schencken
lassen. Summa Fürst von Mansfeld hette in di-
sem Krieg lieber sein Kriegsvolck weder sich selber
bereichert/ immassen gethan der Lacedemonier König
Agelilaus/ wie Plutarchus von ihm bezeuget.

*Plutarchus
in Lacon.
Apoph.*

Es ist aber numehr zeit das ich mich zum letzten
theil diser Oration verfüge / vnd etwas melde von
des Fürsten von Mansfeld Pietet vnd Gottsforcht
oder Gottseligkeit/ welche ein fundament vñ grund-

D i j fest



fest aller Tugenden ist. Fundamentum virtutum
omnium pietas / sagt der Heyd Cicero / vnangesehen
daß im die recht pietet vnd Gottseligkeit vnbeandt
gewesen.

Dise Pietet hat Graff Carl meniglich gnueg-
samb zu erkennen geben : Erstlich mit seinem wa-
ren Glauben gegen Gott / darinnen er geboren / ge-
seuget / gewieget / getauffet / vnd von der Kindtheit
an erzogen worden / welchen Glauben er auch für
Freunden vnd Feinden ohn allen schewen öffentlich
bekennet / auch klar sich vernemen ließ / Er hielt
alle die / welche sich von der Catholischen Kirchen
vnd Glauben abgeworffen / für Heyden vnd offen
Sünder / nach vnser Herrn langst gefeltem vr-
theil: So er die Kirch nicht höret / soll er dir sein
wie ein Heyd vnd Publican.

Zum Tisch des Herrn pfeget er sampt seinem
ganzem Hoffgesindt alle 3. Monat andechtiglich
zu gehen / mit vorgehender ordenlicher Beicht vnd
Buesß / Dann ihm vnuerborgen war / daß er dem
strengen Richter der lebendigen vnd todten / nicht
allein für sein Person / sondern auch für die so von
seinem Brot essen / an jenem Tag rechenschafft wür-
de thun müssen. Insonderheit haben ihr F. G. vor
ihrem verreisen zu Brüssel communiciert / darnach
zu Hall 3. meil von Brüssel bey vnser lieben Frawen /
Item zu Prag / auch allhie zu Wien in diesem Gotts-
hausß /

hauß / stem in Hungerland den 2. tag der Grane-
rischen Belegung / vnd letztlich zu Comarn ein
kleins vor irem absterben.

Darben abzunemen / daß der from̄ Herr bey
allen seinen hohen geschäften vnd verrichtungen
das nöttigist nit vergessen. Derwegen dann auch
Gott seiner nit vergessen / sondern in allen Feinds-
nötten vnd gefehrligkeiten ihm trewliche hilff vnd
beystandt geleistet.

Die Priesterschaft vnd Geistlichkeit haben ihr
F. G. gern bey vnd umb sich gehabt / sonderlich zu
Feldt vnd im Leger / wie sie denn auch von vnser
Societet umb zween Priester angehalten / daß sie
auff ihr F. G. Gewissen vnd Seelenachtung geben
sollen / nach dem Exempel Constantini Magni / von
dem Eusebius schreibt / wie er zu Kriegszeiten gepfle-
get hab Dei sollicitare sacerdotes vt semper cum ipso
verfari, semperq; præsto esse vellent, hosq; tanquam
quosdam animæ custodes ducere, ernstlich anzuhalt-
ten / daß die Priester Gottes on vnterlaß mit im ge-
meinschaft haben / vnd bey im stets sein vnd bleiben
sollen / vnd hab dise mit sich geführet als Seelsor-
ger vnd Seelhütter. In welchem stuck vil Haupt-
leut vnd Obristen sich grob versündigen / dann sie
weder für ihre Personen noch für ire vndergebene
Kriegsleut sich umb Priester vnd Seelsorger be-
werben / sondern leben vnd sterben ohn Gewissen /

D iij

ohn Gott /

Euseb. li. 2.
de vita Cō-
stant. c. 129.

13.

ohn Gott/ on Priester / on Sacrament/ vnd nemen
gleichwol das Gelt so auff die vnderhaltung der
Priester vnd Caplan verordnet / ein weg wie den
andern eyn/ vnd werffen es in iren Beutel / denn
der Mammon ist jnen lieber weder Gott/ Priester/
Sacrament/ Predig/ Gottes dienst/ Himmelreich
vnd ewige Seligkeit.

Der heiligen Mess / welche nichts anders ist
als ein danckbarliches vnd heilsames Gedenc Opf-
fer des vnschuldigen Leidens vnd Sterbens Chri-
sti vnser Erlösers / vnd aller seiner am Holz des
Creuzes erworbenen Verdiensten / haben ihr F. G.
mit grosser andacht vnd empfigkeit bengetwohnet /
vnd sich jnbrünstig beflissen / durch sein Glauben /
bueßfertiges Gebett / vnd gegenwertigen Gottes-
dienst / im solchen Todt vnd Verdienst Christi des
Hern zu appliciern / vnd derselben hab vnd theil-
hafftig zu werden.

Als jr F. G. eines tags zu Comarn kein Mess
haben kondten / vnd im angezeigt war / das in der-
selben Bestung das ganz exercitium Catholischer
Religion abgeschafft sey / thetten sie ein tieffen
seufftzer darüber vnd sprachen: Wie? Soll in einem
solchen ansehnlichen Gränitzhaus Christus mit
seinem Gottesdienst / Kirchen vnd Glauben / auß
vnd abgeschafft sein? In des Kaysers Statt vnd
Haubtfestung gegen dem Türckhen / soll man des
Kaysers

Kensers vnd Gottes Religion außmustern? Was
ist das für ein vnbillicher vnd vnleidenlicher handel?
Diser vnd vil anderer eyfertiger vnd ernsthafter
wort / dauon jetzt nicht zu melden / ließ sich der
Catholisch Held vernemen.

Je mehr sich aber das letzte Sterbstündlein
herzue genahet / je mehr hat er sein Pietet vnd Gott-
seligkeit erzeiget / Denn dieweilen er mit guter ver-
nunfft reden können biß ans ende / hat er den Hoch-
wirdigen Namen IESV / in dem sich alle Knie beu-
gen / deren die im Himmel / auff der Erden / vnd
vnder der Erden seindt / zum drittemal angeruf-
fen / also daß das letzte wort / welches vber sein
Zungen gangen / der süsse Namen IESVS / in welchem
wir alle Selig werden / gewesen ist. Gott hat ihm
etwa darumb dise gnad gethan / daß er solchen heil-
wertigen Namen in seiner letzten hinfahrt auff sein
Zungen nemen können / weiln er fleissig vnd eyferig
darüber gehalten / daß alles Kriegsvolck täglich
nach 3. gethanen Schüssen disen allerheiligisten Na-
men laut im Leger dreymal angeruffen / welchen
Christlichen gebrauch die Sectischen Obristen zu-
vor gänzlich abkommen hetten lassen.

Es haben auch jr F. G. zwar allzeit / aber für-
nehmlich in der Sterbstund iren einigen trost vnd
zuuersicht gesetzt in das bitter Leyden vnd Sterben
deß für vns gecreuzigten Sohns Gottes / in dessen
bluet

Galat. 6.

bluetfliessende Wunden haben sie sich demütigklich beuolhen / auff dessen Verdienst vnd gehorsam / den er seinem Himlischen Vatter bisz in Todt des Creuzes geleistet / haben sie getrawet vnd gebawet / In diesem außervölten Eckstein haben sie sich steiff vnd fest gehalten. Solches anzuzeigen / nemen sie das Crucifixbild in die Arm / umbfahen vnd küssen es / schlagen die Augen vbersich gen Himmel / legen auch jr Haupt auff das Crucifix / vund ruhen also / als ob sie sagen wolten mit S. Paulo : Es sey fern von mir daß ich mich rühme / denn allein in dem Creutz vnseres Herren Jesu Christi / darinnen stehet mein Heyl / mein Hoffnung / mein Leben / mein Auferstehung / darinn finde ich ergetzligkeit vund erquickung meiner Seelen / das soll mein Ruhebettlein vnd mein letztes Hauptküsse sein. In deine Hand O trewer Gott / beuilche ich mein Seel / welche du mit deinem Rosenfarben Blut erkauffet vnd erlöset hast. Bald darnach gibt der Gottliebend Fürst mit saufften vnd stillen zügen seinen Geist auff.

O du thewer Held vund Ritter / wie bald hat dich der Todt gefellet? wie bald hast du das Schloß deines Lebens auffgeben? O Carl / Carl du edles blut / wie lasset du vns mitten in der eussersten noth stecken? Die ganz Christenheit warffe ein aug auff dich / Der Römisch Kenser sampt dem ganzen Römischen Reich hoffeten / nach Gott / auff dich / vnd
du

Du zeuchst von vns vnuersehens hinweg / da man
deiner am meisten bederffte & Wir schreyen dir bil-
lich nach / eben mit den Worten / mit welchen der hei-
lige Prophet Helisæus dem verzuckten vnd hinauff
in Himmel fahrenden Helix nachgeschrien: Pater mi, 4. Reg. 2.
pater mi, currus Israel & auriga eius, O mein Vatter
/ mein Vatter / der Wagen Israel vnd sein Fuhr-
man. Du bist ein Vatter der armen Landsknecht
gewesen / ein Vatter der armen Vnderthanen / ein
Vatter der Wittiben vnd Waisen / du hast den
Wagen führen / lencken vnd leitten können / du hast
das Ross im Zaum reitten vnd zwischen die Sporn
fassen / das ist / Du hast das Christlich Heer re-
gieren vnd meistern können. Wollan diser Wagen /
darinnen wir sicher vnd vnumbgeworffen gefessen /
ist dahin / der Fuhrman ist dauon. Darüber klaget
jungs vnd alts / das beweinet der Arm vnd der
Reich / vber disen vngelegenen vnd vnzeltigen
Todsfall erfrewet sich kein Mensch / denn allein der
Türk / vnd wer mit dem Türcken ein verstande hat
vnd colludieret.

O Todt / Todt / was für ein vnaussprechli-
chen vnd vnwiderbringlichen schaden hast du vns
gethan mit hinnenmung dises Kriegsfürsten / het-
test du dafür ein Beräther oder sonst ein vnütz-
mässigen Brottfresser hinweg genommen vnd ab-
gewürget.

E

Aber

Aber wen es trifft den trifft es : Contra mor-
tis imperium , nullum est remedium. Wider Todtes
gewalt hilfft lauter nichts / keiner kan sich seiner er-
wehren / er sey so starck vnd großmüetig als er im-
mer wölle / da hilfft kein ensener Rock noch Panzer-
hembd / kein Helm oder Sturmhuet / kein Schild
oder Tartschen / kein Säbel oder Schlachtschwert /
kein Pusigän / Stecher oder Streithamer / kein
Spieß / Helleparten oder Gopn / keine Maurpre-
cherin / Garthaumen oder Feldtschlangen / keine Ma-
sceten / Hacken / Puffer oder Handrohr / da hilfft
weder fraut noch lott / weder schanzen noch Poll-
werckh / weder Pasteyen noch Ringmauren / kein
Graben ist so weit / der Todt springt darüber / kein
Schloß ligt so hoch / er ersteiget es / kein Bestung so
wol verwahret / er kompt jr zue. Niemandt ist dem
Todt allzu geschickt / geschwindt vnd verständig /
So kan ihn niemandt mit Gelt bestechen oder mit
geschencken corruppiern. Wann das letzte stündlein
verhanden ist / so must du fort / das vnd kein anders.

O gerechter Gott / der du vns alle dem zeitlichen
Tod / zur straff vnserer verbrechungen im Paradeiß
zu erkendt vnd vnterworffen hast / wir können zwar
wider dich nicht zürnen noch murren / daß du disen
dapffern Kriegßfürsten von Mansfeld von vns ab-
gefordert vnd weg genomen / sondern müssen vilmehr
demütiglich erkennen vnd bekennen / daß wir solchen
vnfall

vnfall wol verdienet/ Dañ wir Christen so wol sün-
digen als die Juden/ denen durch den Propheten
Esaïam gedrowet worden/ daß du von ihnen/wegen Esa. 30.
ihrer vilfeltigen vbertrettung / hinnemen werdest
ritterliche Helden / ehliche Leüt/ guete Rätthe/ ver-
ständige Obristen/ gelehrte Männer/ künstliche mei-
ster/ ic. Aber O Herz sey mitten im zorn auch ein-
gedenck deiner Barmherzigkeit/ vnd verleihe gene-
diglich/ damit der Mansfeldisch Geist zwifach fah-
re in seine Nachkömmling / gleich wie der Geist Helix
zwifach gefahren in Helixum. Dein Allmechtiger
Armb ist nicht abgekürzet/ der Brunn deiner ober-
schwenclichen wolthatten bleibt noch vnerschöpffet/
du bist an einen Menschen nicht gebunden/ du kanst
vns andere erwecken vnd zuschicken/ die es mit der
Christenheit auch trewhertzig vnd auffrichtig mei-
nen/ zu mehrem lob vnd außbreitung deines hoch-
heiligen Namen/ Solches von der Göttlichen maie-
stet zu erlangen/ vnd zu sonderlichem trost der See-
len der gegenwertigen verstorbenen Fürsten / wöllen
wir Christen niderknien vnd das heilige Vatter vn-
ser sampt dem Englischen grueß andechtighklich spre-
chen..

ERRATA TYPOGRAPHICA.

Lit. B. pag. 1. fac. 2. lin. 15. lise vns für vos.

B. pag. 4. fac. 2. lin. 1. lise einer Statt/ für einem Statt.

C. pag: 1. fac. 1. lin. 20. lise/ man pfeget tag vnd nacht.

[Faint, mostly illegible text, likely bleed-through from the reverse side of the page. Some words are difficult to discern but appear to include:]

[Large, stylized handwritten signature or initials in blue ink, possibly reading 'W. J. B. 1717']


[Handwritten number '1717' in blue ink]

[Faint, mirrored text, likely bleed-through from the reverse side, possibly 'ERRATA TYPOGRAFICA']

[Faint, mirrored text, likely bleed-through from the reverse side, possibly a list of corrections or a table of contents]

[Small handwritten mark or number in the bottom right corner, possibly '171']





B.I.G.

Farbkarte #13



...e Oration

in loblichen

heroischen Tugen-

Christlichen vnd seligen

en Fürsten vnd Herrn /

Graffen zu Mansfeld / Edlen

der Röm: Kay: Mtt:zc. Rath

leuten Ampt des Christlichen

ingern / vnd der Rön: Mtt:zc.

vnd Admiral des Vnders

ers / zc. hochseliger

chtnuß.

ten durch

Societatis Iesu Theolo-

Septemb: Anno 1595. in

n / bey der Catholischen Bez

deren daselbsten depositierten

gegenwert Fürst: Durch:

zogen zu Mantua

ontforat / zc.

r: XI.

stra verterunt exterorum.

im Streit / haben der fremb-

e flucht geschlagen.

Osterreich bey Leonhard

Lämbel Burschen.

Xa
2881

BIBLIOTHECA
MUNICAVIANA

UNIVERSITÄT
HALLE
(SAALE)